

01 FEB 2001

SAMBUTAN KEBANGSAAN TAHUN BARU CINA AHAD INI DI PULAU PINANG

PULAU PINANG, 1 Feb (Bernama) -- Sambutan Tahun Baru Cina peringkat kebangsaan anjuran Kementerian Kesenian, Kebudayaan dan Pelancongan akan diadakan sepanjang jalan di Lebuh Armenian/Lebuh Acheen, Ahad ini.

Pengerusi Jawatankuasa Pelancongan, Kebudayaan, Kesenian dan Pembangunan Wanita Negeri, Datuk Kee Phaik Cheen berkata, Perdana Menteri Datuk Seri Dr Mahathir Mohamad adalah antara ribuan tetamu yang dijangka hadir pada majlis itu.

Selain itu Timbalan Perdana Menteri, Datuk Seri Abdullah Ahmad Badawi dan Menteri Kebudayaan, Kesenian dan Pelancongan, Datuk Abdul Kadir Sheikh Fadzir juga dijangka hadir.

Sambutan ala parti jalanan itu akan bermula pada pukul 5 petang dan dirasmikan oleh Ketua Menteri Tan Sri Dr Koh Tsu Koon.

Perdana Menteri dan rombongannya dijangka menyertai majlis itu pada pukul 8 malam bagi menyaksikan beberapa acara menarik dan kebudayaan masyarakat Cina di samping melawat beberapa buah bangunan bersejarah seperti Khoo Kongsi, Cheah Kongsi, Yap Kongsi dan bangunan Poh Hock Seah.

Kee berkata, lebih 30,000 orang termasuk pelancong luar negeri juga dijangka menghadiri sambutan itu dan orang ramai boleh menikmati jamuan Tahun Baru Cina itu dengan membeli kupon daripada 20 buah gerai yang mengambil bahagian.

-- BERNAMA

NER PR